



Organizacioni odbor za prikupljanje podataka i sačinjavanje evidencije djece ubijene i nastradale u periodu 1992. – 1995. godine i izgradnju spomen obilježja ubijenoj i nastradaloj djeci u tome periodu na području općine Goražde, danas je u Maloj sali Općine Goražde održao još jedan sastanak u nizu na kome se razgovaralo o konačnom utvrđivanju spiskova poginule djece, kao i prijedlozima teksta koji će biti upisan na spomeniku, te otvaranju spomen obilježja koje je planirano za 18. septembar kada se obilježava i Dan Općine Goražde.

Riječ je o Odboru koji je formirao Načelnik Općine Goražde koji je proveo aktivnosti na prikupljanju podataka kao i na provođenju aktivnosti vezanih za gradnju spomen obilježja u ul. Zaima Imamovića.

Prema riječima načelnika mr. Muhameda Ramovića, projekat izgradnje spomen obilježja je u završnoj fazi čime će se konačno odati dužno poštovanje i trajno ostaviti u sjećanje sva nevina djeca koja su stradala na području općine Goražde u periodu 1992. – 1995. godine.



Treba naglasiti da su prethodno raspisani konkursi za idejno rješenje spomen obilježja, a sam projekat će koštati 150.000,00 KM za što su sredstava obezbijedena iz Budžeta Općine i iz drugih izvora kao što su donacije privrednih subjekata i privatnih lica. Izvođač radova je

goraždanska firma Kaja Company.

Spomenik ubijenoj djeci u centru grada privodi se kraju. Uporedo sa građevinskim radovima, Odbor je kontinuirano radio na prikupljanju svih relevantnih podataka i danas smo i zvanično došli do spiska na kojem se nalaze imena 151 ubijeno djetete u periodu 1992.-1995.god. Predvidjeli smo mogućnost da nismo upisali svako ime, i iz toga razloga smo pozvali i građane ako bilo ko ima dodatni podatak da nam ga dostavi, na čemu ćemo biti jako zahvalni. Svaka informacija nam je jako bitna, pogotovo ako su roditelji van države i nemaju kontakte sa Bosnom i Hercegovinom. U svakom slučaju ostavićemo i nekoliko slobodnih mjesta za naknadno upisivanje jer želimo projekat do kraja provesti dostojanstveno i učiniti sve da ne zaboravimo neko od stradale djece. Ako se to ipak desi, na ovaj način ostavljamo mogućnost da to ispravimo. Zvaničan termin otvaranja je 18. septembar i mislimo da je to najpogodniji dan i da zaista tom danu trebamo svi posvetiti pažnju. Nismo ni svjesni da imamo devet roditelja koji su izgubili po dvoje djece. Danas smo usaglašavali tekst koji treba da se nađe na spomen obilježju i na putu smo da pored nekoliko ponuđenih tekstova izaberemo onaj koji će biti najprikladniji na ovome spomeniku. Bez obzira na sve, još jednom ćemo da se sastanemo sa svim roditeljima kojima ćemo predočiti tekstove da i oni sami daju svoju saglasnost jer nam je najvažnije da su roditelji zadovoljni i sa tekstom i sa samim načinom ispisivanja imena. Imena će biti upisivana po datumu pogibije sa upisanim imenom roditelja, danom rođenja i danom pogibije. Sve detalje smo razradili i mislim da će to biti spomen obilježje-park koji će da nas podsjeća na ono što se desilo. To je podsjećanje na izgublenu mladost, to je armija, čitava škola djece. Danas bi to bili odrasli ljudi koji bi davali doprinos svojoj državi. Imali smo nesreću da se to dogodi i mi iz tog razloga i iz poštovanja prema djeci i roditeljima, želimo da dostojanstveno napravimo ovo spomen obilježje i radove privedemo kraju.“ – kazao je na kraju sastanka načelnik Općine Goražde, mr. Muhamed Ramović.